



ილიას სახელმწიფო უნივერსიტეტი



საქართველოს ჯანდაცვის
ჯივნი ბიბლიოთეკა

იოანე ანჩელი

გალობანი
ანჩისხატისანი

იოანე ანჩელი
გალობანი ანჩისხატისანი

გალობანი ანჩისხატისანი

სიბრძნეო მამისაო, დასაბამო და მიზეზო კეთილისაო, ღმერთო, ღმრთისაჲ სიტყუაო, ქრისტე, მომმადლე მე სიტყუაჲ მადიდებელსა ხატსა განკაცებისა შენისასა!

აღიძრვიან ენანი, პირველადვე უწყებულნი, ადამის ტომთა, ერთა და ენათანი ქებად, გალობად და დიდებად ქებულსა და დიდებულსა მაცხოვრისა ხატსა საშინელსა!

შეგვწყალენ, მოწყალე, ქმნილნი და დიდებულნი შენნი, რომელსა ზედა წოდებულ არს სახელი შენი წმიდაჲ და საშინელი, რომელთათჳს განჰკაცენ სიტყუაჲ მამისა დაუსაბამოსაჲ!

ისმინე ვედრებისა ჩუენისა და შევრდომისა და მსწრაფლ გამოგჰკსნენ ყოველთა ჭირთაგან შენნი მოსავენი და მოქენენი და მომლოდენი წყალობისანი, ხატო საშინელო!

ნეტარ არს ერი იგი, რომელმან იცის გალობაჲ და დიდებაჲ და შესხმაჲ შენი, ხატო, არსთა ჰსნად განკაცებულისა ძისა ღმრთისაო, მეოხო მარადის მოსავეთა შენთაო!

ესაია წინადაწარ გჰქადაგა განკაცებაჲ და ვნებაჲ ვნებულთათჳს და დაჰსნა შენ მიერ, ნათელო და ნათლისა ღმრთისა, სიტყუაო ღმრთისა მამისაო, იესუ ქრისტე!

ლოცვაჲ ჩუენი ისმინე და მოხედენ ვედრებასა და სულთქუმასა ჩუენსა და ნუ გარემიიქცევ პირსა შენსა ჩუენგან, არამედ წყალობით მოგუხედენ ოხითა მშობელისა შენისაჲთა!

საკვრველებანი შენნი ვინ-მე მიუთხრნეს უფალო, ანუ ვინ სასმენელყვნეს ქებულებანი შენნი, რამეთუ მოსწყლავ თანა-ლმობითა შემცოდეთა და ჰკურნებ წყალობითა განწირულთა!

აჰა ესერა მოვივლტვით შენდა მომართ მოწყალისა, მაცხოვრისა და მკურნალისა, და მოქენენი შეგივრდებით და ვითხოვთ მოწყალებით

შეგვწყალენ, ანჩისხატო საშინელო!

ამისთვისცა ერი შენი ჭირვეულნი [შეგივრდებიან] გალობით, სულთქუმითა და ტირილითა, რამეთუ უწყით მოწყალეებად შენი, აწცა მოდერკ მწყალობლად და გუაცხოვნენ, მაცხოვარო, მონანი შენნი! ნუ განგზრისხნები მკსნელო, ნუ გულისწყრომით გუამხილებ, ნუ რისხვთა შენითა გუასწავლი, არამედ რისხუასა შინა წყალობანი შენნი პირველნივე მოიკსენნე, მაცხოვრისა ხატო საშინელო! ჩუეულებისაებრ აღვსძრავთ, ქრისტე სიტყუაო ღმრთისაო, მეოხებად უბიწოსა მშობელსა შენსა, გვკსნენ ოხითა მისითა ჭირთა და განსაცდელთაგან უღირსნი ესე მონანი შენნი!

ინებე რად მოქცევად ჩუენი, ურწმუნოთად, სარწმუნოებად, ქრისტე ღმერთო სახიერო, ხატი განკაცებისა შენისად მოციქულისა ანდრიაძს მიერ გამოგზბრწყინვე! სმენა ესმა ამბაკომს პირველ მოსლვისა შენისა, ღმერთო, სიტყუაო ღმრთისაო ქრისტე, განკვრევით ღაღად-ყო, რომლისა თანა ჩუენცა ვკმობთ, დიდებად ძალსა შენსა, უფალო!

არვინ არს ჩუენ კაცთაგანი მორწმუნეთა, ხატო საშინელო, რომელმანცა ხადა სახელსა შენსა და არა მყის მიემთხვა შენ მიერ წყალობასა დიდსა, დიდებად შენდა!

ხილულისა ღმრთისა სიტყუსა, არსთა კსნად განკაცებულისა, ხატო საშინელო, სახიერო და მოწყალეო, მოწყალეობით მოგუხედენ და დაგვცვენ მოსავნი ესე შენნი!

აღიძრვიან ყოველნი ერნი, ზეცისა და ქუეყანისანი, დიდებად და გალობად შენდა, მშობელო ღმრთისაო, გვოხენ მოსავნი ესე შენნი და ძისა შენისანი!

ტკბილი, სახიერი და მოწყალე პირი შენი დაატკბე ჩემ ზედა, ხატო საშინელო, რამეთუ შენ ხარ შუებად და სიხარული და ნუგეშინის-მცემელი და ჯელის ამპყრობელი! სიტყუაო ღმრთისაო, დეგ ჩუენ თანა და მარადის დღე და ღამე გუცევდ და გუფარევდი ყოველთა ჟამსა, შემწე გუეყავ, და გვკსენ ჩუენ ხილულთა და უხილავთა მტერთაგან! ადამის

ტომთა დიდებად და სიქადული და სამკაული შენ ხარ, სიტყუაო ღმრთისაო, შენ მოწყალე ყავ ჩუენ ზედა ძე შენი და უფალი ყოველთა და შემოქმედი!

უწყებულმან პირველ წინადაწარმეტყუელმან სულითა იხილა განკაცებად ღმრთისაჲ ჩუენისა და ესრეთ დაღად- ყო: აჰა ქალწული მიუდგეს და შვეს ძე, ისმინეთ წარმართთა და იძლიენით!

გუამოვნებით სამო, ბუნებით ერთო, მხოლოო მარტო უცვალებელო, ხატო მამაო და ძეო და სულო წმიდაო, დაგვცვენ ჩუენ უღირსნი ესე მონანი შენნი და გვკსენ ყოველთა განსაცდელთაგან! აწცა შეგივრდები და მარადის გევედრები ცოდვილი და უღირსი მონაჲ შენი საწყალობელი, და თანაღმობით გამომიკსენ ყოველთა ჭირთაგან მოსავი შენი, ხატო საშინელო!

ლომებრ გუექადიან მტერნი ჩუენნი და გუეცინიან, არამედ შენ, ხატო საშინელო, მკლავითა შენითა შემუსრენ, რომელ ცნან ყოველთა, ვითარმედ შენ ხარ ძალი ჩუენი და სიმტკიცე ჩუენი! ოდეს იგი ჰყოფდე განსჯასა ჩუენსა საშინლებით, იესუ სიტყუაო ღმრთისა სახიერებისაო, მას ჟამსა შემეწიე და დამიტკბი მრავალმოწყალეო და ნუ მოიკსენებ ცოდვათა და ბრალთა ჩემთა! ზაგითა უღირსითა ვიკადრებთ შენდა მდაბალნი ესე და უღონონი მონანი შენნი და ვადიდებთ და თაყუანის-ვსცემთ მოწყალეობათა შენთა, აღგვკყარ ჯელი ხატო საშინელო! უთესლოდ მშობელი ქალწული და ქალწულადვე დაცული ადამის ტომთაგანი არა არს თჳნიერ შენსა, ჩუენ ცოდვილთათჳს მსწრაფლო მეოხო, დედაო ძისა ღმრთისა მშობელო! ნუ დამივიწყებ მოსავსა შენსა და მადიდებელსა სიტყუაო, ღმრთისაო, რათა გაქებდე: კურთხეულ ხარ შენ უფალო საუკუნითგან უკუნისამდე! დღე და ღამე ერი მგალობელი შენი და მადიდებელი შენი იკსენ, რათა მადლობით ვიტყოდეთ, ხატო საშინელო, დიდება წყალობათა შენთა!

ოჳფალო, ღმერთო, გვკსენ ჭირთაგან მოსავნი შენნი და მგალობელნი და თაყუანის-მცემელნი სახესა ჩუენთჳს განკაცებულისა ხატისა შენისა

წმიდისასა! ისმინე ჩუენი, ცოდვილთა ამათ და უღირსთა მონათა შენთაჲ,
და მოდერკ წყალობად და მოწყალებად, ხატო საშინელო, რათა
გაკურთხევდეთ უკუნისამდე!

იყავნ წყალობაჲ თაყუანის-მცემელთა და მადიდებელთა შენთა ზედა
რომელნი აღგიარებენ შენ დედად ღმრთისა ჩუენისა, მეოხო მარადის
მოსავთა შენთაო!

ოდეს მოვიცხენნე სასწაულნი შენნი, ურიცხუნი და საშინელნი, ანჩის
ხატო საშინელო, განსაკრთომელნი გონებითა და განცვფრებულნი
ვღაღადებთ: ყოველნი საქმენი აკურთხევდით დღეს ღმერთსა და უფალსა
უგალობდით და ამალღებდით მას უკუნისამდე!

ვითარცა პირველ ნინეველნი, ჩუენცა შეგივრდებით და გევედრებით
შენ, მრავალმოწყალო და სახიერო, წყალობით შეგვწყალებ და ნუ
განგუწირავ უღირსთა ამათ მონათა შენთა, რომელნი თაყუანისვსცემთ
ხატსა განკაცებისა შენისასა!

ანდრია თავი მოციქულთა, პირველ წოდებული მოწაფე მეუფისა
დიდისა, იდიდებოდენ ყოველთაგან უღაღთა ღადოთა კლარჯეთისათა,
იერაპოლით მოვიდა და ხატი ესე საშინელი ჩუენ მოსავთა მისთა
მოგუანიჭა!

ნეტარ არიან მოსავნი და მადიდებელნი შენნი და თაყუანის-მცემელნი
მაცხოვრისა, ხატო საშინელო, რამეთუ მადიდებელთა და თაყუანის-
მცემელთა ადიდებ და მავედრებელთა მისცემ თხოვასა და აღუსრულებ
და სასოებასა მათსა არა არცხუენ ყოვლაღვე!

ეჰა ძეო დაუსაბამოო და დაუსრულებელო დაუსაბამოსა მამისა და
სულისა თანასწორო, რომელი პირველ ჟამთა მხოლოდ მხოლოდსა
მამისაგან იშევ, ხოლო აწ ჩუენთვს ქალწულისაგან განჰკაცენ
გამოუთქუმელად, დიდებაჲ წყალობათა შენთა! აღესრულნეს აწ იგავნი
და სახენი, წინამსწარმეტყუელთაგან უწყებულნი: ქალწულმან შვა
ქრისტე უთესლოდ, რომლისათვს მორწმუნენი ესრეთ ვღაღადებთ და
ვიტყვთ: ყოველნი საქმენი აკურთხევდი!

ნებსით თვსით შეგცოდეთ და განგარისხეთ და დავივიწყებით წყალობანი შენნი, ხოლო აწ შენდავე მოქცეულთა მოგუხედენ, გუაცხოვნენ, შეგვწყალებენ და გვკვენ ბოროტთაგან, მაცხოვრისა ხატო საშინელო! ჩუენთვის კაცქმნილო, ღმერთო სიტყუაო მამისაო ქრისტე, გვკვენ ყოველთა ჭირთა და განსაცდელთაგან მოსავნი ესე შენნი და თაყუანის-მცემელნი ხატისა შენისანი, მოწყალებო შეგვწყალებენ და წყალობანი შენნი მოგუანიჭენ!

ესმოდენ ურწმუნოთა, რომელნი არა თაყუანის-ცემენ ხატსა ქრისტეს ღმრთისა და ყოველთა წმიდათა მისთასა, იტყოდეს რაჲ ბასილი, ვითარმედ უკუე პატივი ხატისა პირმშოადსა მის სახისად აღიწევის, რომელსა ჩუენ მორწმუნენი თაყუანის-ვსცემთ!

ლიტანიობდით, გალობდით და ადიდებდით ყოველი სული და ყოველი დაბადებული ყოვლისავე სულისა მორწმუნისა მეოხსა, ზღუდესა და მფარველსა, მცველსა და მაცხოვარსა, ანჩის ხატსა საშინელსა! ისმინე ცაო და ყურად იღე ქუეყანაო, რამეთუ ქალწულმან, ასულმან ადამისმან, გვშვა ადამიანთა იესუ მაცხოვარი და გვოხს მის წინაშე და გვთხოვს წყალობასა აწ, მარადის და უკუნითი უკუნისამდე!